



BARINGKUAS

REBOLUSYONARYO A DYARYO TI UMILI TI CAGAYAN VALLEY

2020

OKTUBRE - DISYEMBRE

P20.00

EDITORIAL

Papartaken ti Panagabante ti Rebolusyon iti Tengnga ti Awan Kapadana a Krisis ken Pasismo



Agleppas manen ti 2020 ken maysa ket guddua a tawen laengen ti nabatbati iti termino ti rehimen Duterte. Ngem kas iti naglabas, napaay daytoy ken dagiti amo na nga imperyalista a gun-oden dagiti kontra-umili ken kontra-rebolusyonaryo a gandat da.

Imbes nga mailung-aw dagiti umili manipud iti krisis ti ekonomya, lalo ketdi a nairarem da iti kinarigat ken panagbisin, kinaawan wenno kinakurang ti trabaho, kinaawan wenno kinababa ti pastrek ken pannakalugi dagiti negosyo, a pinakaro pay ti madi a panangsango ti rehimen iti pandemya a COVID-19. Awan manamna a panagdur-as ti nailyan nga ekonomya a nakabasar iti sistema nga mangpatpatalinaed a kas agraryo, saan nga industriyal ken atrasado a para-serbi kadagiti kasapulan ti sangalubongan a kapitalista a merkado.

Manipud idi mangrugi dagiti *lockdown*,

kimmaro pay ti panagrigat dagiti umili. Ta imbes a saysayaaten koma ti rehimen Duterte a risoten dagiti problema kanaig iti krisis ti kabiagan ken umno a sangoen ti pandemya, mas tinalmegan daytoy ti panangiluges kadagiti karbengan-tao ken panangpairot iti kontrol iti poder.

Impangruna daytoy dagiti narurungsot ken manangliplipit nga addangen kontra kadagiti umili ken pwersa a lumablaba para kadagiti nailyan ken demokratiko nga interes da. Iti tengnga ti pannakakumikom ti sangapagilian iti panangsango ti pandemya, inlibas daytoy nga ipasa ti

LINAON

- 1 EDITORIAL
- 4 AGDAMA A KASASAAD
Nawaya Dagiti Agar-Ari A Dasig, Bayat A Nakapupok Ti Umili
- 7 PASISMO TI ESTADO
Panaglabsing Kadagiti Karbengan Tao, Kimmaro Pay
- 8 Napigsa nga Labanan ti Linteg ken Pagannurutan ni Duterte Kanaig ti Terorismo ti Estado
- 9 TIGNAYAN TI KABATAAN
Iti Kawar ti "Distance Learning"
- 11 TIGNAYAN TI MANNALON
Ad-adu a Balligi Para Iti Rebolusyon Agraryo
- 12 TIGNAYAN TI UMILI
Organo dagiti Bileg Pangpulitika ti Umili, Lumawlaw
- 14 ARMADO A DANGADANG
21 nga Army, natay kadagiti opensiba ti NPA-Cagayan
Hukbo a Pang-laban, Pang-propaganda ken Pang-produksyon
- 16 PAMMADAYAW
Mary Grace "Ka Tina" Bautista: Modelo nga Rebolusyonaryo a Kadre ken Ina
- 18 KULTURA
Naindaklan a Bulong ti Rebolusyon
- 19 Abante!

Ti **BARINGKUAS** ti opisyal a pagiwarnak ti rebolusyonaryo nga umili ti Cagayan Valley. Ipabpablaak daytoy ti Partido Komunista ti Pilipinas iti rehiyon ti Cagayan Valley iti maminsan kada tallo a bulan.

Aw-awisen ti patnugutan dagiti agbasbasa nga mangted-biang para iti panangpadur-as pay ti pagiwarnak. Agipatulod kadagiti komentaryo ken rekomendasyon, damdamag ken rebolusyonaryo a kapadasan a mabalin nga ipablaak iti dyaryo tayo. Umawawat daytoy iti sursurat iti: baringkuascv@gmail.com.

maaw-awagan nga *Anti-Terror Law* a ti linaon na ket panangligalisa iti terorismo ti estado.

Ngem imbes a masebseban, rinubroban pay ti terorismo ti estado ti panaglapan dagiti umili. Kas iti naduma-duma a paset ti pagilian, dimmur-as pay ti rebolusyonaryo nga armado ken di-armado a dangadang iti Cagayan Valley. Limmawa pay ti natignayan a base ken sona a gerilya ti New People's Army. Kadagiti lugar a narekober ti NPA kalpasan a nabayag a napanawan, napudot latta ti panangsarabo dagiti masa iti rebolusyonaryo nga hukbo da. Kadagiti siguden a matigtignayan, rimmingbaw ti rebolusyonaryo a pangngeddeng ken militansya dagiti masa iti laksid ti panagtalinaed sadiay ti kabusor iti atiddog a panawen. Iti kabuklanna, awan napasurender ti kabusor a rebolusyonaryo a pwersa ken masa malaksid kadagiti sinaggaysa laeng a nabulok ken oportunista.

Basar kadagiti pangrugi nga ulat, dimmakel ti pwersa ti dadduma a yunit ti NPA iti 45-55 porsyento. Nairussuat ti nasurok 20 nga taktikal nga opensiba ken aksyon a panagdusa ti NPA a nagresulta iti saan a bumaba iti 55 a kaswalti ti kabusor ken nakakumpiskaran ti sumagmamano nga armas. Nagbuwis met kadagiti dependsiba a labanan ti uppap a Nalabbaga a mannakigubat ken pannakatiliw ti tallo pay.

Napaneknekan manen ti kina-inutil dagiti *focused military operations* ti kabusor lalo kadagiti lugar a natenneben iti

rebolusyonaryo a panaglapan dagiti masa. Nu pay immadu dagiti kampo ken naguper dagiti *Retooled Community Support Program* (RCSP) ti kabusor iti adu a barbaryo, immadu latta iti 25 porsyento dagiti Komiteng Rebolusyonaryo sa Baryo (KRB) ken kasta met dagiti Komiteng Balangay dagiti rebolusyonaryo nga organisasyon masa (ROM).

Rimmegta pay dagiti antipyudal a kampanya a nakagun-odan kadagiti balligi iti panangpasayaat iti kasasaad dagiti mannalon. Nagtignay kadagitoy ti mano gasut a mannalon ken napasardeng da dagiti naduma-duma a langa ti panaggamgam ti daga ken ti agtutuon wenno compounded nga panagpainteres iti pautang dagiti usurero-komersyante ken garantor da, ken naingato ti tangdan dagiti makitegteged.

Simmaknap dagiti kampanya ti masa kanaig iti umno a panangsango iti COVID-19. Mano pulo a barbaryo ti nagiwawasan ti relief dagiti progresibo nga organisasyon. Daytoy ket iti laksid ti panangpakaro pay ti estado ti panangmarka a nalabbaga wenno red-tagging ken panangliplipit kadagiti progresibo nga organisasyon. Situtured da a nagtignay ken timmulong kadagiti umili.

Timmibker ken dimmakel pay dagiti rebolusyonaryo a pwersa iti Cagayan Valley. Natenned da kadagiti naiirteng a pannakidangadang a pulitikal ken militar ken ngim-mato ti rebolusyonaryo a kamulatan da. Nairussuat dagiti paggaadal iti Abanteng Kurso ng Partido, Intermedyang Kurso ng Partido, Batayang

**“
Rinubroban pay ti
terorismo ti estado
ti panaglaban,”
dagiti umili.**

Kurso ng Partido ken edukasyon a pangpulitika. Saan a bumaba iti 15 porsyento ti dimmakkelan ti bilang dagiti kameng ti Partido.

Iti apagserrek ti 2021, namnamaen ti panagkaro pay ti krisis iti ekonomya ken pulitika. Kasla agmauyong nga ayup ti rehimen, a bayat nga agpadpadara iti nakakaro a sugat ket lallalo rumungrungsot. Ipasigurado na a makapagtalinaed iti poder ti bukod a pamilya ken paksyon ni Duterte iti labes ti 2022 ken kamakamen ti gandat na a marebbek ti rebolusyonaryo a tignayan. Isu a nakarkaro pay nga awtoritaryan nga ad-adda ngen ken pasismo ti iwasiwas na. Iti kastoy a basaran, masirmata ti umadani a panagdalluyon ti panaglaban ti nalawa nga umili.

Kangrunaan a rebbengen dagiti rebolusyonaryo nga pwersa iti Cagayan Valley nga agpakatibker ken agpakalaing pay tapno idauloan dagiti dangadang ti masa ken papartaken ti panagabante ti gubat ti umili iti nangatngato a tukad.

Rumbeng nga ingato ti kabaelan ti NPA tapno maparegta dagiti taktikal nga opensiba nga adda kangrunaan a panggepna a makakumpiskar iti ad-adu nga armas. Irussuat dagiti kumperensya ken pagsasanay a mangragup kadagiti kapadasan iti labanan, mangpadur-as iti kabaelan iti paniktik ken kontra-paniktik ken mangingato iti kabaelan dagiti kumander a mangidaulo kadagiti tukad-platun ken kompanya a pormasyon

ken labanan. Agpakalaing dagiti platun iti arte ti konsentrasyon, dispersal ken panag-akar, tapno mapadur-as ti kabaelanda a pang-opensa ken pangdepensa ken dagiti trabaho da iti intar ti masa.

Pagtitinnulongan dagiti yunit ti NPA ken organisasyon masa kadagiti aw-away ken siyudad a mamin-ano a paaduen dagiti yunit ti NPA babaen kadagiti regularakampanyaitipanagrekruit iti Nalabbaga a mannakigubat. Rumbeng a palawaen pay dagiti erya a matigtignayan ti NPA bayat a maibalbalanse ditoy ti pannakakonsolida pay ken panaglawas dagiti siguden ken barbaro a base a gerilya.

Rumbeng a paregtaen dagiti naduma-duma a kampanya ken dangadang dagiti masa. Pagiggaman dagiti kampanya para iti rebolusyon agraryo kas pangkabuklan a tulbek iti panagdakkel ti hukbo ti umili. Igeddan nga irussuat dagiti kampanya nga anti-pasista a nakasilpo iti panaglaban ken panangpatakyas iti pasista ken tirano a rehimen Duterte. Ingato dagiti dangadang nga anti-pyudal ken anti-pasista babaen kadagiti kampanya nga anti-imperyalista. Itudo ti rehimen Duterte a kas managbaybay-a ken kangrunaan a nagbasol iti agtultuloy a panagwaras ti COVID-19 iti pagilyan. Rumbeng a pagiggaman ti isyu ti pandemya ken dagiti kalamidad, nga potensyal a rissik a makapagpabettak iti nabileg a tignayan ti umili kontra iti rehimen Duterte.

Nakapatpateg ti trabaho a propaganda iti pananggaw-at iti pinulpullo-ribo nga umili tapno malawagan ken makumbinsir da kadagiti programa, patakaran ken panawagan ti nailian-demokratiko a tignayan. Siguradoen ti tunggal yunit ken komite a

makapagpaadu iti dumakdakkel a bolyum ken umad-adu nga tipo ti propaganda, lallalo ti kanaig dagiti dangadang a pulitikal ken militar ken panangibutaktak kadagiti kinaulbod dagiti propaganda ti kabusor.


Papartaken ti panag-organisar kadagiti komiteng balangay dagiti ROM. Adu metten a barbaryo ti mabalinen nga takderan iti KRB malaksid pay dagiti immunan a natakderan.

Mamin-ano a paaduen ti mapagturpos kadagiti rebolusyonaryo nga edukasyon a pangpulitika ken tallo-atukad ti edukasyon iti Partido. Irussuat dagiti paglalagom kadagiti kapadasan. Paregtaen pay dagiti panagdidinnillaw iti uneg ti tunggal kolektibo basar iti panggep a mapadur-as ti rebolusyonaryo a panagtrabaho ken pamuspusan iti panagtrabaho ti tunggal rebolusyonaryo. Papartaken ti panagrekruit kadagiti kameng ti Partido basar kadagiti pamantayan.

Kumpyansado ti rebolusyonaryo a tignayan iti Cagayan Valley a makagun-od kadagiti balligi nga agturong iti daddadakkel pay a balligi iti tawen 2021. Naganagan ti daga para iti rebolusyon iti tengnga ti awan kapadana a panagkaro ti krisis ti sistema a mala-kolonyal ken mala-pyudal iti Pilipinas ken ti krisis ti imperyalismo iti sangalubongan. Nasayaat a nakapwesto ti rebolusyonaryo a tignayan iti sangapagilian ken rehiyon tapno maidauloan ti panagdalluyon ti pannakidangadang ti umili a Pilipino para iti nailyan a waya-way ken demokrasya nga addaan sosyalista a perspektiba. **B**

Panangsango ti rehimen ni Duterte iti Covid-19:

Nawaya dagiti Agar-Ari a Dasig, Bayat a Nakapupok ti Umili



Agsiyam a bulanen manipud iyetnag tirehimen Duterte ti umuna nga lockdown iti nalawa a paset ti pagilian. Pambar da a tapno kano malapdan ti panagwaras ti COVID-19 manipud iti pannakipulapol iti tattao a posible nga naakaran met kadaytoy. Arigna't higante a pagpupokan ti intakder ni Duterte iti

nalawa a paset ti pagilian. Ngem agingga ita, awan pulos makita a panagsardeng wenno uray panagbuntog laeng ti panagwaras ti bayrus.

Iti babaen ti *lockdown*, nairot a kinontrol ti gargaraw dagiti umili. *Lockdown* ti pamuspusan ti rehimen tapno maikalintegang wenno mailemmeng ti panangbaybay-a iti rebbengen na nga umno ken naan-anay a sangoen ti pandemya, ti nakaro a panaglabsing kadagiti demokratiko a karbengan ti umili, ti panagtakaw ti kwarta ti pagilian, ken panangligalisa ken panangipatungpal iti awtokratiko ken terorista a panagturay ni Duterte. Ngem bayat nga agsagaba dagiti umili gapu iti “pannakaipupok” dagiti demokratiko a karbengan da ken dagiti resultana a panagkaro ti kinarigat ken bisin, awan lapped dagiti nangisit a maniobra ti rehimen Duterte.

“Nawaya” a panangbaybay-a ti rehimen iti rebbengen na

Kuna da nga ti panagugas ti ima ket umuna a napateg nga addang tapno saan a maakaran ken makaakar iti bayrus. Ngem ti met rehimen Duterte, “agugugas iti ima” tapno tallikudan ti obligasyon na nga umno a sangoen ti pandemya ken ipasa iti umili ti pammabasol iti panagwaras ti sakit!

Iparparammag ti rehimen nga dakkelen ti nautang ken naibukbok na a pondo iti panangsango iti COVID-19. Ngem anya ti kasasaad dagiti naimpeksyon kadaytoy?

Pimpiman dagiti pasyente kadagiti kaaduan nga pasilidad a pangkwarentina ti gobyerno. Ta

nagadu ti nakwarantina a bukod da a gastos ti inaldaw-aldaw a makan da, wenno maladladaw da amangan, ken saan a nasayaat ken napudot ti bentilasyon kadagiti kwarto. A raman a makagapu iti pannakarikna ti stress ken depresyon dagiti adu kadakuada, ta malaksid a madanagan iti kasasaad a pangsalun-at da ket pagpanunotan dapaytialawans da ken saan a nasayaat a makainana! Kanayon a maladladaw ti doctor a mangtsek-ap kadakuada.

Iti babaen ti emerdyensi a pangpubliko a salun-at a kas ti COVID-19, responsibilidad ti estado nga ammoen ken biruken no nagpatinggaanen ti bayrus tapno maisina wenno

makwarantina ti naimpeksyon, maaddangan ti masakit ken maprotektaran ti saan pay nga naimpeksyon. Daytoy ti tulbek a solusyon iti problema a bigbigbigen uray ti *United Nations*. Ngem saan met daytoy nga ipatpatungpal ti rehimen. Isu nga aginggan ita ket bulsek daytoy iti aktwal nga saklaw ti impeksyon!

Ti ab-abbungan ti rehimen Duterte: kinessayan na ti badyet para iti *Epidemiology and Surveillance Program* manipud iti P262.9 milyon aginggan a P115.5 milyon, a dakkel a nangpakapuy iti kabaellan ti *Department of Health* (DOH) a sangoen ti panagsaknap ti sakit. Ilimlimed daytoy ti nakaro

a kasasaad ti pangpubliko nga imprastruktura ti salun-at, kas dagiti perdi-perdi a pasilidad ken kinakurang ti panagpondo ti estado kadagiti pangpubliko nga ospital.

Bulbuladas ken parparbo laeng ti sangkasao ni Duterte a pabakunaan ti 75-80 porsyento ti populasyon ti Pilipinas. Ta kasano nga maaramid na ket awan pay ti nasayaat a plano ti rehimen kanaig ti panagpatang, panag-imbak, ken panagiwaras ti bakuna. Ta umuna ket saan pay a nalpas ti *testing* ti kaaduan dagiti bakuna. Ken maikadua, limitado ti bakuna nga inkeddeng dagiti dadakkel a kompanya a parmasyutiko kadagiti atrasado ken babassit a pagilian a kas ti Pilipinas.

“Nawaya” a panaglabsing kadagiti karbengan-tao

Iti panawen dagiti *lockdown*, namin-ano nga immadu ti kaso ti panaglabsing kadagiti karbengan-tao gapu iti militarista a panangsango ti rehimen iti pandemya. Napwersa ti umili nga suruten ti patakaran a “panagtalinaed-ti-balay”, ta nu saan ket mabalina a makaraman iti ranggas ti estado. Iti rugrug ti *lockdown*, minandaran ni Duterte dagiti pulis ken militar nga paltugan aginggana’t matay ti asinnoman a saan sumurot kadagiti protokol daytoy.

Iti Region II, iti umuna pay laeng a tallo a bulan ket saan a bumaba iti 19,385 ti kabuklan a bilang ti natiliw gapu kano iti panaglabsing. Idiay Tumauni, San Isidro, ken Alicia iti Isabela ken Baggao iti Cagayan, linapdan dagiti pulis dagiti mannalon a mapan koma agtrabaho kadagiti talon da iti karruba da a barangay. Linapdan nga agkalap dagiti bumaryo iti isaang da a lames gapu ta nadanunan ti curfew. Adda pay

pinagsubli a pinagawid dagiti pulis nga ag-ina, a mapan koma patsek-ap ti gurigor diay anak.

Iti Santiago City, tiniliw ti pulis ti katorse anyos a tin-edyer a mapan laeng mangarruba ken pinaruar da laeng kalpasan a pinagbayad ti nagannak iti P4,000. Kasta met diay *construction worker* nga awan *facemask* na bayat nga agkarpintero iti atep ti balay ti karruba da.

Naipaima kadagiti hepe ti pulis ti panangted ti *travel pass* kadagiti umili nga kasapulan nga agbyahe-byahe, idinto nga ti trabaho na ket awan kainaigan iti

militarisasyon ken panaglabsing kadagiti demokratiko a karbengan iti sangapagilyan. Siguden nga disenyo ti rehimen Duterte ti militarista a pamuspusan a nakasilpo iti gandat na nga itupak ti *martial law*. Pinakaro pay ti rehimen daytoy iti panawen dagiti *lockdown*, nga ita ket nayon a pagrason na ti panangkontrol iti panagsaknap ti pandemya. Mas nawayan isuna nga pagbalinen ti sangapagilyan a kas higante a pagpupokan.

Ranggas ti militar ken pulis ti isango na, nu man sika ket saan a sumurot kadagiti protokol iti *lockdown* wenna adda kayat mo

RAGUP TI PANAGLABSING TI KARBENGAN-TAO ITI CAGAYAN VALLEY
Kabayatan iti pandemya a COVID-19



8,713
natiliw gapu iti panaglabsing ti *social distancing*



414
natiliw gapu iti *disobedience to a person in authority*



1,187
natiliw gapu iti saan nga panag-usar ti *face mask*



4,375
natiliw gapu iti panaglabsing ti “mandatory reporting of notifiable diseases” o RA 11331



4,456
natiliw gapu iti panaglabsing ti *oras ng curfew*



240
natiliw gapu iti *pagpapasada ti tricycle*

*manipud Marso hanggang Hulyo 2020

tungtongan nga salun-at.

Isu nga saan a makapakigtot nu apay imbaga ti *United Nations* nga ti Pilipinas ti adda iti umun-una kadagiti listaan ti kaaduan ti panagtiliw ti panawen ti *lockdown* nga dimmanon ti 120,000 ti natiliw gapu iti “panaglabsing ti *curfew*”. Kayat a saoen, maysa ti pagilian tayo a kauulpitan ti wagas iti panangsango ti pandemya.

Ngem sakbay pay dagiti *lockdown*, kimmaron ti

nga iyebkas ken itignay kanaig kadagiti madi a pangkagimongan a paspasamak. Kas idi Abril, nasurok 100 nga pulis ti imbaon ti rehimen a mangperdi iti barikada dagiti minorya nga Tuwali-Ifugao iti pagminasan ti *Oceana Gold* sadiay barangay Didipio, Kasibu, Nueva Vizcaya. Ilegal nga inaresto, imbalud, binutbuteng, kinabil ken sekswal nga hinarass ti 36 a minorya.

Bayat nga limitado unay ti inted ti rehimen a pangbadyet

kadagiti naan-anay a kasapulan a medikal, ibukbukbok na latta ti dakdakkal a badyet para iti militar ken pulisya. Iti kangitingitan ti pandemya, impangruna na ti panaggatang iti babbaro nga *attack helicopter* ken dadduma pay nga armas panggubat para iti *Armed Forces of the Philippines* a naggatad iti P2.4 bilyon. Sabali pay diay plano na nga gatangen nga armas nga aggatad iti P75 bilyon.

Kageddan ti panagpuskol dagiti militar ken pulis kadagiti mayor a kalsada ken syudad ket ti napuspuskol manen a presensya dagiti pasista a tropa kadagiti barbaryo iti kaawayan. Dadakkal ken nasedsed dagiti operasyon militar kadagiti adu nga il-ili iti Isabela, Cagayan, lower Apayao, Quirino ken Nueva Vizcaya.

Pinaypayan pay ti rehimen ti panangmarka a Nalabbaga wenno *red-tagging*, panangliplipit ken gandat a panangaresto ken panangranggas kadagiti myembro dagiti legal a progresibo nga organisasyon a nareregta nga agkamkampanya para iti *mass testing* ken agiwarwaras iti *relief* kadagiti naapektaran iti *lockdown*.

Nasaysayud a panagkurakot

Ti limitado nga badyet nga impaay ti rehimen kanaig ti pandemya ket dakkel pay a nakessayan gapu iti nakaro a kurapsyon ni Duterte, ti pamilya na ken dagiti nangangato nga opisyal ti gobyerno, militar ken pulisya. Napnuan korapsyon ti panaggatang kadagiti ramramit medikal. Kas ti *nucleic acid extraction machines* nga nagatang kanu iti P4 milyon, ngem nakurang laeng a kagudwa gayam ti pudno a gatad na!

Ti *Personal Protective*

Equipment (PPE) nga ginatang da kanu iti P1,800 tunggal set ken *swabbing kits* nga P1,600 iti tunggal maysa, ngem tig-P400-P1,000 ken tig-P600 laeng gayam! Iti kabuklan na, saan a bumaba iti P17 bilyon ti naibulsa ni Duterte ken dagiti kakumplot na manipud laeng kadagitoy. Dakes na pay, aglanglanga nga limitado dagiti *test kits* para kadagiti masakit, ngem saan kadagiti pulitiko ken militar.

Ti binilyon a piso nga *Social Amelioration Fund* (SAF) ket inkeddeng ni Duterte nga tenglen ti AFP ti panangiwaras kadagitoy. Panggep na a mapatibker pay ti panagserbi da iti rehimen na. Ngem agingga ita, manmano pay laeng nga pamilya ti nakaawat iti abereyds ti tig-P5,000. Agdinamag a nagdiretso ti dakkel a paset ti SAF kadagiti paborito na nga opisyal-militar.

Namin-ano met a dimmakkel ti utang ti pagilyan kadagiti ganggannaet a bangko nga agpapautang. Pagramason ni Duterte iti panagutang na a para kanu iti panangparegta iti ekonomya ken *emergency relief*. Ngem ti bangir met laeng daytoy ti panangilibre ti panagbuwis wenno *tax holiday* dagiti gagayyem na a dadakkal a kumpanya.

Umili a Pilipino, pagsungbaten ni Duterte!

Iti panawen ti pandemya a COVID-19, lallalo a kimmaro ti krisis iti ekonomya ken pulitika ti mala-kolonyal ken mala-pyudal a sistema. Ta umuna iti amin, awan kabaelan ti agdama nga saan-nga-industriyal, agraryo ken atrasado nga ekonomya a pagturturayan dagiti mananggundaway a dasig a sangoen ti kastoy a kapartak-nga-agwaras ken kasaknap a bayrus.

Maikadua, nagsabat ti

kagagalad ti rehimen Duterte nga awan seryoso a panangisakit na iti salun-at ken pagsayaatan ti nalawa nga umili ken ti ipangpangrunana ket ti interes dagiti agar-ari a dasig lallalo ti bukod na a pamilya ken kakumplot na, ken ti gandat ken gagar na a mangitakder iti awtokratiko ken diktatorial a panagturay tapno makapagtalinaed iti poder iti labes ti 2022.

“Baro a normal” ti awag ti rehimen Duterte iti agdama a klima ti nasaknap a kinarigat ken kinakurang, kinarungsot ti estado kadagiti umili ken ti agtultuloy a panagwaras ti bayrus. Panggep na nga paspasurot lattan kadagiti sao na ti umili a Pilipino.

Ngem iti nalawa a paset dagiti umili, awan makita da nu di kinasipnget ken kinaawan-namnama para iti naraniag a masakbayan. Kageddan na, mabukbukel iti panunot da ti adu a saludsod, bukod da a sungbat kadagiti saludsod, ken pangngeddeng; maum-ummong kadagiti barukong da ti naglalaoka danag ken pungtot, pannakaupay ken tumibtibker a desisyon. Umadani ti panagburek, ken panagbettak ti pangkagimongan a bulkan!

Iti sidong iti managbaybay-a, kurakot, awtokratiko ken kontra-umili nga rehimen, rumbeng a buklen ti panagkaykaysa ti nalawa nga intar ti umili tapno agsarita iti maymaysa a boses, ipukkaw iti maymaysa a panawagan ken agtignay iti maymaysa a direksyon, tapno paksiaten ti kangrunaan a peggad iti salun-at, biag ken masakbayan da – ti bayrus iti uneg ti Malacanang nga ibagbagi ni Rodrigo Roa Duterte ken ti rehimen na.

Iti kastoy laeng nga epektibo a masango ti pandemya ti COVID-19! **B**

Nu pay nakaturong ti atensyon ti pagilian ken sangalubongan iti panangrisot iti Covid-19, saan nga inibbatan ti rehimen Duterte ti talmeg na a sangsangoen manipud idi ibulgar na ti pudno a pasista a maris na: ti pananglupek-lupek kadagiti demokratiko a karbengan ti umili.

“Aw-awagan dak a pasista, nasayaat. Awagan kayo met a terorista.” Sungbat daytoy ni Duterte kadagiti tignayan ti umili a mangilablaban kadagiti nailian ken demokratiko a tarigagay da. Pinasaklaw na ti kaipapanan ti sarita a “terorismo” ken “terorista”, a pakairamanan dagiti organisasyon, partido ken indibidwal a nakaramot iti nalawa nga masa ken napaneknekan a napudno a mangilablaban kadagiti interes, kalikagum ken pagsayaatan dagiti umili.

Nu saan a kas “kontra-droga” ket “kontra-terorismo” ti kumbinyente a rason ti rehimen Duterte kaano man ken sadinno man nga iyablat na ti terorismo ti estado. Bayat a mas masansan ken napigpigma ti panagpukkaw na iti “kontra-terorismo”, dumardaras ken kumarkaro met ti brutalidad na iti panaglalsing kadagiti karbengan-*tao* ti lumaw-lawa nga intar ti umili, iti kaaw-awayan man wenno kadagiti syudad ken sentro ti ili.

Kadagiti Syudad iti Rehiyon...

Iti Cagayan Valley, nai-dokumentado ti nasurok 30 a kaso ti harassment laban kadagiti ligal a progresibo nga organisasyon iti uneg laeng ti lima a bulan (Marso-Hulyo 2020). Nasurok 100 nga indibidwal ken 24 nga organisasyon ti kabuklan a biktima iti intero a rehiyon. Kaaduan kadagiti biktima ti mangirupupir ti karbengan iti daga, kabiagan ken salun-at iti agdama a pandemya.

Iti panangatake ti rehimen Duterte kadagiti progresibo

nga organisasyon, partido ken personahe, umuna nga addang na ti panangmarka kadagitoy a kas Nalabbaga, wenno *red-tagging*. Kas dagiti ar-aramiden dagiti *tao-an* ti *5th Infantry Division Philippine Army* ken kapulisan a pana-panawen a panagisab-it ken panagiwaras iti rinibribo a sako ken polyeto kadagiti haywey a mangpanpanagan kas “komunista-terorista” kadagiti lider ken myembro dagiti ligal a progresibo nga organisasyon, a pakairamanan dagiti organisador dagiti nabotosan a partylist iti kongreso, ken uray ti dati nga arsobispo ti Tuguegarao City a ni Sergio Utleg!

Markaan da met a kas “milisyang bayan” dagiti lider mannalon a kameng dagiti nabotosan a partylist iti kongreso ken ligal nga organisasyon masa, sa da pasurenderen ida. Saan man nga aktwal a nagpakita dagitoy kadagiti kampo ti militar wenno pulisya, wenno napilitan da man a napan basar iti “panangimbitar” kadakuada ti militar wenno pulisya iti tulong ti gobernador wenno mayor, ar-aramaten dagiti opisyal-militar ti nagan da tapno makalekkab ken makapagibulsa manipud iti dakkel a pondo ti *Enhanced Comprehensive Integration Program* wenno E-CLIP ti rehimen Duterte. Kaano laeng ket ilegal nga inaresto da dagiti pito a mannalon nga kameng ti maysa a ligal nga organisasyon, a pakairamanan ni Joey Ramos, dati a kapitan ti Barangay Balagan, Sto. Nino, Cagayan. Ilegal met a rinikisa ti pagtaengan ni Isabelo Adviento, dati a nominee ti partylist nga Anakpawis, sadiay Carupian, Baggao, Cagayan, a nu

Panaglalsing kadagiti Karbengan-*tao*, Kimmaro Pay

sadinno ket awan isuna kadayta a panawen ken minulaan dagiti operatiba ti *Criminal Investigation and Detection Group* ti maysa nga *high-powered rifle* ti balay da.

Kalpasan a mamarkaan da a kas kameng ti NPA, isaruno da nga iyaramid ti *extra-judicial killings*. Kas ti inaramid da kenni Randy Felix Malayao idi Enero 2019. Sa danto ipabasol met laeng ti krimen iti NPA!

...Ken Kadagiti Kaaw-awayan

Kadagiti syudad ket *red-tagging* ken ekstrahudisyal a panagpatay nga ipabasol da iti NPA dagiti kangrunaan a langa ti terorismo ti estado.

Kadagiti met aw-away, panagkampo, panaguper iti tengnga ti barbaryo, pananglipit, ken masaker kadagiti mannalon nga paruaren da a kas NPA ti iyab-ablat ti militar kontra kadagiti mannalon.

Retooled Community Support Program ti kaudian a tawag ita ti militar kadagiti yunit da nga aggup-uper ken arigna’t agkampon kadagiti sentro ti kabalbalayan kadagiti barbaryo.

“Kontra-terorismo” ti kumbinyente a rason ti rehimen Duterte kaano man ken sadinno man nga iyablat na ti terorismo ti estado.

Aramid da ti manguriro, mamutbuteng, agisaknap kadagiti madi a bisyo a kas ti sugal ken inom, wenno madi a kultura kas ti pornograpiya ken panangkabit kadagiti assawa wenno annak ti mannalon, agtakaw ti manok, ken dadduma pay.

Kageddan dagitoy dagiti dadakkel nga operasyon militar a pagbutbutngan dagiti

bumaryo gapu iti kinalaing dagiti agop-operasyon a tropa a manglipit ken mangranggas kadagiti umili. Nu mapalaban da ket agusar iti pangbomba nga eroplano wenno pangmasinggan nga helicopter, nga ti dakes na ket sibilyan met laeng ti dandani tamamaan da. Sa danto pabasolen ken pagibalesan dagiti bumaryo, a sapaap nga marka da a kas “NPA” ken “komunista”.

Paborito nga ar-aramiden dagiti Army ti panagirussuat kadagiti bogus nga “panagsurender” dagiti bumaryo, nga itudo da a kas kameng ti milisya ti NPA, ken pagtaudan ti dakkel a maibulsa da nga pondo.

Iti kaudianan a datos, sadiay sityo Lagum iti Barangay Lipatan, Sto. Nino, Cagayan, 14 a bumaryo ti nagbalin a biktima ti pammutbuteng, panagpangta, ken panagpwersa nga aramid ti *17th Infantry Battalion*. Karaman pay ti sibubukel a bumaryo

a makapadpa-das iti nakaro nga riribok ti



baryo gapu ti awan-lapped a panagkampo dagiti suldado kadagiti barangay hall, eskwelaan, kapilya ken mismo nga pagtaengan da.

Kakuyog ditoy ti illegal a panagsukain dagiti militar iti balay da Juliet Lappao idi umuna nga lawas ti Pebrero 2020. Parbangon met ti maika-14 ti pada nga bulan, tiniliw dagiti pwersa ti 17th IB da Francisco Solancho ken inderetso da sadiay kampo ti batalyon. Karaman ti kumander ti 17th IB a ni Lt. Col. Saguiguit, ininteroga da iti nakasina nga klasrum ti eskwelaan da Salvador Empleo, Jayme Mariano, Francisco Bayaoa, Albert Indammog ken Benito Indammog.

Iti bangir amin dagitoy nga awan ti iggem dagiti suldado nga *search warrant* ken mandamyento-de-aresto. Ken umuna ti amin, ket saan met a trabaho ti militar ti agtiliw, agsukain ti siasinnoman a balay ken ag-interoga!

Pinerdi dagiti militar ti nangato nga tukad ti panagkaykaysa ken nadur-as nga innammuyo (bayanihan) dagiti masa iti panagtrabaho gapu’t laplapdan met isuda dagiti suldado nga pumanaw kadagiti balbalay da aglalo dagiti nakapauneg iti innammuyo.

Linteg para iti Terorismo ti Estado

Bayat a makumikom ti sangapagilian iti panangsango iti bayrus, kasla birkug iti rabii nga inlibas ti bunggoy ni Duterte nga aprubaran a kas linteg ti *Anti-Terror Bill* (basaen ti kanaig nga artikulo). Iti kabuklan na, panangligalisa daytoy iti nabayagen a nasaknap nga maar-aramid nga adu a langa ti terorismo ti estado kontra iti umili.

Ngem saan a nakalusot daytoy iti imatang ken panagsupyat dagiti demokratiko a sektor ken organisasyon. Nasurok 30 a petisyon manipud kadagiti grupo ti mannalon, mangmanged, kabataan, babbai, nailian a minorya, Moro, abogado, taga-simbaa ken naduma-duma nga organisasyon ti naisumite iti Korte Suprema laban iti panangipatungpal ti saan a Konstitusyon nga *Anti-Terrorism Act of 2020*. Pakakitaan daytoy ti nalawa a panagsupyat ti umili iti daytoy a linteg. **B**

Napigsa Nga Labanan Ti Linteg Ken Pagannurutan Ni Duterte Kanaig Ti Terorismo Ti Estado



Partido Komunista ti Pilipinas
Oktubre 18, 2020

Dagiti annuroten ken regulasyon nga inyawat iti *Anti-Terror Council* (ATC) ni Duterte ket mangipakpakita no kasano diay makunkuna nga *Anti-Terror Law* ket mausar tapno bekkelen dagiti saan nga umannugot ken lipiten dagiti sibil

ken politikal a karbengan. Gan-gandaten daytoy nga linteg nga aginkukuna a kas “panangrespeto ti karbengan-*tao*” ngem ti pasista nga saung na daytoy ket maiparang kadagiti detalye.

Ti Seksyon 4.4 ket manangallilaw a mangilista kadagiti adbokasiya, protesta ken dadduma pay nga kapada nga panangiamid iti sibil ken politikal nga karbengan kas “saan a makuna nga terorismo” BASTA SAAN LAENG dagitoy nga agserserbi iti “terorista” a panggep a nakairamanan ti “pammutbuteng iti sibubukel nga publiko” wenno “agparnuay iti pul-oy wenno agiwaras iti mensahe ti buteng” ken dadduma pay a kraytirya nga ikarkarit dagiti kakumplot ni Duterte kadagiti kritiko na.

Kunkunaen ti DOJ nga ti pagannurutan nga “panagsuspetsa laeng” ket saan a mabalin nga rason ti panagtiliw. Nupay kasta, ibagbaga dagiti pagannurutan nga ti indibidwal wenno dagiti grupo ket mabalin nga awagan kas terorista babaen iti ATC “iti nalawag a basaran ti panagsuspetsa” nga, syempre, addan ton iti panangipursigi dagiti panatiko iti uneg ti ATC.

Ipabpablaak ti ATC nga awan kanu ti hudisyal wenno *quasi-judicial* a bileg na, ngem inikkan-bileg na ti bagi na tapno mangiruar iti listaan “dagiti nanaganan nga terorista” nga iti aktwal ket agserbi nga pannusa a pannakatay para kadagiti nakaraman. Balbaliktaden na daytoy dagiti nabigbig-ti-sangalubongan nga istandard ti usto nga proseso ken basaran nga prinsipyo iti “inosente malaksid no napaneknekan a nagbasol” a no kadagiti adda iti listaan ket sigurado nga tratoen kas nagbasol ken mabalin nga ipauneg iti pananglipit ken pananglikida ti estado. Tagtagibassiten daytoy dagiti napagballigian ti sangkatao-an iti tay-ak ti burges a linteg ken karbengan-tao. Daytoy nga linteg ken dagiti pagannurutan na ket tungpa iti internasyunal a legal nga kumbensyon ken isinsina na ti pagilian a kas malalais a pagilian.

TIGNAYAN TI KABATAAN

Iti Kawar ti “Distance Learning”

Laslastog ti *Department of Education* (DepEd) ti naballigian ken nasayud kano a panagsubli iti eskwela ti nasurok 24 milyon nga estudyante idi umuna nga lawas ti Oktubre. Iti laksid daytoy dagiti negatibo a reaksyon dagiti adu nga estudyante ken titser iti makunkuna nga “adda distansya na a panagadal” wenno *distance learning*.

Daytoy a baro a klase ti panagadal ket alternatibo ti rehimen Duterte manipud iti dati a wagas a panagserrek dagiti agadal kadagiti klase da. Gapu kanu ta napeggad ti panagadal ti ginasgasot inggana’t rinibribu nga estudyante iti tunggal eskwela iti panawen ti pandemya, kasapulan nga adda distansya dagiti estudyante ken titser iti tunggal maysa bayat nga agad-adal. Maiyaramid daytoy iti onlayn a pamuspusan.

Awan nagdumaan daytoy iti praktika ti kontra-insurhensiya ti AFP nga kanayon nga addaan iti “listaan ti myembro ken suporter ti NPA” ken mandaran dagiti adda iti baryo nga pumauneg kadagiti otoridad na babaen iti panagsagaba iti pannakaaresto ken ekstra-hudisyal a panagpatay.

Nayon na pay, mangmangted dagiti annuroten ti ATA iti nalawlaw nga gundaway para kadagiti pwersa ti estado nga agipatungpal iti panang-aresto nga awan ti *mandamyento de aresto* ken panangpaatiddog ti pannakaibalud iti aginggana 24 nga aldaw nga awan iti kaso, surbeylans ken *wiretapping*, pananglipit iti karbengan ti tattao nga agbyahe ken dadduma pay nga kinarungsot ti bileg.

Makikaykaysa ti Partido kadagiti *civil libertarians*, tagadepensa iti karbengan tao ken managayat-ti-wayawaya nga Pilipino iti panangikundena kadagiti annuroten ken regulasyon ken iti panangiulit-ulit iti dawat para iti panangibasura ti *Terror Law* ni Duterte.

Dagiti saan a nasayaat nakapasamakan daytoy nga saan-a-demokratiko nga linteg kadagiti karbengan a sibil ken wayawaya ket makapapungtot ken nasaknap. Ti dakkal a bilang dagiti demokratiko nga pwersa ket rumbeng nga agmaymaysa, sititibker a tumakder, napigsa nga labanan daytoy a linteg ken ipukkaw ti dagus a pannakasardeng na daytoy.

Amin a responsable kadaytoy nga pasista nga linteg ket rumbeng nga pagbayaden iti panangited-kabaelan kenni Duterte nga agari kakuyog ti awanan-bain a terorismo. Rumbeng a mapatakyas da kakuyog dagiti pada na nga narurungsot tapno maikkan-dalan iti panangisubli ti wayawaya babaen iti baro, mas demokratiko nga rehimen. **B**



Edukasyon a Nakasanggir iti Signal, Gadyet ken Load

Manipud idi rugian nga ipatungpal ti *distance learning* a nakasanggir iti panagusar ti internet, nagbalin a nadagsen a parikot nu kasano a maaddaan ti regular ken estable nga kuneksyon iti *internet* tapno makairussuat kadagiti klase. Iti kabuklan na, bassit a porsiyento laeng ti populasyon ti pagilian ti adda akses na iti internet. Nu saan a ti makagapu ket ti kinaawan-kabaelan nga aggastos para kadagiti gadyet ken load, dakkel pay a makagapu ti kinaawan wenno kinakapuy ti signal a mausar tapno makapag-onlayn. Bassit laeng a paset dagiti probinsya ken ili ti adda naan-anay a signal a maala, lallalo kadagiti lugar a kambabantayan ken addayo kadagiti syudad ken sentro ti ili.

Ngem nu adda man maala a naan-anay a signal, problema latta dagiti adu nga agad-adal ti paggastos iti gadyet ken load! Lallalo ita nga agtaltalinaed ti krisis pangkabiagan, a permi pay a pinakaro dagiti nagsasaruno a lockdown ken dagiti kanaig na a pagannurotan, nga ti epekto na ket panagbassit wenno kinaawan ti kabaelan dagiti adu a nagannak nga mangted kadagiti annak da iti para-gadyet ken load. Sa pay awan ayuda manipud iti reaksyonaryo a gobyerno.

Manegnegosyo Latta nga Edukasyon

Nayon pay iti adu a riribuk nga intulod ti panagadal a nakasanggir iti *internet* ket ti agtultuloy a panagkolekta ken panangingato iti matrikula dagiti agadal. Saan a makatao daytoy iti tengnga tidakkel a pannakakessay ti kabaelan ti nalawa nga bilang ti umili para kadagiti basaran a kasapulan da gapu iti panagkaro ti krisis iti panawen ti pandemya.

Pammaneknek laeng nga dagiti akinkukua kadagiti eskuela ket mas kangrunaan a kas kapitalista ken sekundaryo laeng a kas edukador. Impangruna da latta ti panangpataray kadagiti pagadalan a kas negosyo uray iti panawen ti nakaro a krisis.

Ti 50 porsiyento nga bilang dagiti estudyante a saan nga naka-enroll ita ket pakakitaan ti nakaro a panangirarem dagiti nasao a problema iti karbengan dagiti kabataan para iti edukasyon.

Panangbaybay-a ti Gobyerno iti Edukasyon

Nupay kastoy, napuskol ti rupa ti DepEd a mangipabpablaak a nasayaat ti *distance learning*. Uray pay rumingbaw ti adu a mirugrog, misuot, libbi, wingiwing ken dadduma pay a langa ti pannakadismaya dagiti estudyante ken titser a ti makagapu ket manipud kinakirang ti modyul ken dagiti leksyon a linaon dagitoy aginggana iti nagbuntog nga *internet*, kinakurang ti alikamen dagiti estudyante, ken uray ti panang-abusar iti kasasaad ken kabaelan dagiti titser nga awan ti umdas nga suporta wenno kompensasyon.

Agkurkurang dagiti maimprenta nga modyul ti DepEd nga dimmanon payen iti punto nga naggugudwaan ti tallo inggana't lima nga estudyante ti maymaysa nga modyul kada lawas. Adda da pay titser nga nagimprenta iti modyul manipud iti bukodda a balsa. Kadagiti pangpubliko nga eskwelaan ti hayskul iti rehiyon, dua nga *printer* laeng ti abereyds nga us-usaren para ti agarup 10,000 nga estudyante!

Nagbassitan ngamin ti naiyalokar nga badyet ti rehi-men Duterte para ditoy, ken agngangabit nga bumassit pay iti

sumaruno nga tawen. Bayat nga binilbilyon ti gasgastusen ni Duterte para iti militar ken kontra-rebolusyonaryo nga gubat, permi ti kinakirmot na iti badyet dagiti serbisyo iti edukasyon ken salun-at.

Adu ti damag kanaig iti nakaro a pannakaapektar dagiti estudyante gapu iti presyur nga inyanak ti rigat ti *distance learning*. Iti nabiit laeng ket adda manen maysa nga estudyante ti Grade 12 a nagpakamatay gapu ta saan a naawat ti modyul a naladaw na nga inpasa.

Iti tengnga ti pandemya, agtultuloy met ti pananglipit kadagiti progresibo nga organisasyon ti kabataan a mangirupirupir iti *mass testing*, solusyon a medikal ken maka-umili nga alternatibo a patakaran nga ti edukasyon ket para koma iti amin.

Iti Cagayan Valley, inaresto dagiti kapulisan ti uppat a lider kabataan sakbay da pay a makairussuat ti protesta sadiay Tuguegarao City idi Hulyo. Nayon ditoy ti panang-kick-out iti sangapulo nga estudyante iti eskwela da kalpasan a kiniddaw da iti administrayon ti eskwela iti *refund* ti matrikula aglalo dagiti saan nga nausar.

Isu nga lalo nga nainkalinangan ti panangpairteng ti panaglapan dagiti kabataan, saan laeng a para iti karbengan da iti natalged ken maka-umili nga edukasyon, no di ket uray kadagiti basaran a karbengan ti nalawa nga umili. Isilpo da dagiti sektoral nga interes ken kalikagum da iti kabuklan a pannakidangang para iti nailian a waya-way a ken pudno a demokrasya. Agserbisyo da ken lumaok iti rebolusyonaryo nga armado a pannakidangadang kas kangrunaan a langa ti dangadang tapno mabalaliwan ti agdama a mananggundaway ken manangirurumen nga agar-ari a sistema. **B**

Iti konsolidasyon ti demokratiko a gobyerno ti umili

Ad-adu a Balligi Para Iti Rebolusyon Agraryo

“Talaga a natangken ti tattao ditoy!”

Nakuna daytoy ti maysa nga opisyal militar iti op-operasyonen da a baryo. Burburtya kenkuana ta apay saan da mapatukma ken maisina ti New People’s Army kadagiti bumaryo. Idinto ta namin-adu dan a nagirussuat iti dadakkel ken nasedsed nga operasyon, nagitakder ti kampo iti dua nga karruba a baryo, ken adun nga ulit a panaguper dagiti *Retooled Community Support Program* (a dati a maaw-awagan ti *Peace and Development Team* wenna *Special Operations Team*).

Para iti pasista nga opisyal militar, misteryoso nu ania ti ar-aramiden ti NPA tapno nauneg ken natibker a makaramot daytoy kadagiti masa. Ti saan na maawatan, awan met sabali nga tulbek nga pagig-iggeman ti NPA nu di ti maysa kadagiti kangrunaan a sangsangoen iti intar ti masa tapno iyabante ti gubat ti umili – ti rebolusyon agraryo.

Panagdur-as ti Rebolusyon Agraryo iti Rehiyon

Nabayagen a mairusrussuat dagiti naduma-duma a kampanya nga antipyudal ti mannalon a nakagun-odan da kadagiti balligi. Ta daytoy ti sungbat iti basaran a problema dagiti mannalon a bumukbukel iti 75 porsyento ti populasyon ti pagilian ken umak-akem a kas kangrunaan a pwersa ti rebolusyon.

Dakkel a nakatulong ti rebolusyon agraryo iti panagpartak ti panaglawa ken pannakakonsolidatiaduabasekenzona a gerilya. Nabukel gapu kadagitoy ti ad-adu ken nangatngato a tukad dagiti rebolusyonaryo nga organisasyon masa, malaksid pay dagiti inprastruktura a militar ken pannakarekluta ti adu a mannakigubat ti NPA. Agingga iti pannakabukel ken panaglawa dagiti Komiteng Rebolusyonaryo sa Baryo a basaran a yunit ti Demokratiko a Gobyerno ti Umili (DGU).


Iti sakop ti DGU, nairot a maipatpatungpal ti rebolusyonaryo a programa ti reporma nga agraryo. Kangrunaan nga agtigtignay ditoy ti organisasyon ti mannalon, ti Pambansang Katipunang Magbubukid. Suportado isuda ti DGU, ken kasta met ti NPA.

Tignayan nga Anti-usura

Kaano laeng ket nairussuat iti sumagmamano a baryo iti rehiyon ti panagtignay dagiti mannalon tapno kumprontaren ti sumagmamano nga guarantor nga agserserbi kadagiti dadakkel nga usurero-komersyante. Dagitoy guarantor ket karaman iti bassit nga apo’t daga wenna nabaknang a mannalon nga agnaed iti asideg ti base a gerilya, kakabagian wenna nasinged a gayyem met laeng dagiti rebolusyonaryo nga aktibista ken sumupsupportar iti DGU. Impakaunan nga inlawag a saan nga antagonistiko ti relasyon iti baet dagiti basaran a saray ti mannalon ken dagiti nasao nga sektor. Us-uraren laeng ida dagiti usurero-komersyante, a kangrunaan ken nakarkaro nga amang a manggungunday kadagiti mannalon.

Ania dagiti isyu ti mannalon kadagiti nasao a guarantor?

Umuna, tuluy-tuloy latta dagitoy a mangsingir kadagiti mannalon iti interes ti utang uray nakaro a nadadael ti mulmula da iti panawen dagiti bagyo. Maikadu a ken dakdakes na pay, nu saan a mabayadan ti utang kalpasan ti maysa a cropping ket aganak ti prinsipal iti kapadana



a balor. Ken aginggana't saan a mabayadan amin (prinsipal ken dagiti annak na) ket matuonan latta ti interes na, uray nabayadanan ti prinsipal na.

Iti maysa a kaso, adda maysa a mannalon a nakautang ti herbisidyo a 2-4-D nga agbalor laeng ti P880, ngem nagbalin daytoy a P40,000 idinto nga binayadan na daytoy babaen ti panag-trabaho na iti kuman ti guarantor iti mano a *cropping*. Iti maysa pay, nakautang ni mannalon iti P51, 700, nga nagbalin a P358, 500 gapu ta saan a nakabayad ta nadidigra ti kuman na iti tallo a *cropping*.

Iti naiyiskedyul a panangkumprontar dagiti mannalon kadagiti guarantor, timmakder dagiti pannakabagi ti DGU a kas *moderator* ken testigo iti aniaman a mapagnunumuan. Linaokan daytoy iti nasurok 140 nga mannalon manipud iti sumagmamano a baryo ken sumagmamano nga guarantor. Nagbayag ti panagpapatang iti uneg ti innem nga oras. Dagiti nadanon da a panagsisinnabat ket inyaramidan da iti nakasurat ken pinirmaan da a katulagan.

Linaon ti katulagan ti pannakapunas ti utang dagiti amang pay a nakabayad, ken ti saan a panagbayad iti sobra nga interes ti utang. Dagiti saan pay a nakabayad ket agbayad laengen iti prinsipal nga utang ken pang-maysa a *cropping* nga interes.

Tignayan Tapno Ingato ti Tangdan

Iti maysa pay a panagtignay dagiti mangmangged-talon a pakairamanan dagiti minorya iti sakop ti DGU, nairupir da kadagiti agpatpatrabaho a nabaknang a mannalon nga ingato ti tangdan da manipud P150 mapan iti P250 ti kada aldaw.

Karaman pay a napagkaykaysaan ti nagbaetan da ti kanaig ti kasasayatan nga oras ti panagtapog ken panaglarga manipud ti panagtrabaho iti kuman, ken ti mamindua a libre a pameryenda ti agpatrabaho ken ti libre nga pangaldaw. Kasta met a saanen nga itultuloy ti nakairuaman a panagpainom ti arak kadagiti makitangtangdan iti tunggal malem, ta maysa daytoy a pagtataudan ti riribok iti uneg ti baryo.

Kontra iti Panagagaw iti Daga

Iti dua pay a baryo, nagtignay met dagiti basaran a saray ti mannalon tapno supiaten ti panagpalawa ti daga dagiti sumagmamano a karaman iti nangato a saray ti mannalon, a nu sadinno ket sinaklaw na dagiti talon da. Nagbalin a *moderator* iti nairussuat a kumprontasyon ti maysa nga opisyal ti DGU. Naisardeng ti gandat nga agpalawa ti daga dagiti imbuelto a karaman iti akinngato a saray.

Panagdakkel ti NPA

Ti napatpateg pay malaksid kadagiti pang-ekonomya a balligi ti rebolusyon agraryo, naallukoy ti umad-adu nga agtutubo a nakaimatang kadagiti naballigian a kampanya ken panagtignay nga anti-pyudal tapno tumipon iti NPA. Naamiris da ti kinapudno iti liriko ti maysa a kansyon nga “*nu awan ti baro nga hukbo ti umili, awan uray aniaman ti masa nga inadipen.*” Adda da dagus nga nagkameng iti NPA iti panawen ti kampanya, ken adda da pay agsagsaganan nga tumipon. **B**

TIGNAYAN TI UMILI

Iti Laksid ti Militarisation,

Organo dagiti Bileg Pangpulitika ti Umili, Lumawlaw

Nasurok makatawen a “binekkel” ti rehimen Duterte dagiti umili iti sumagmamano nga agkakarruba a baryo iti maysa a probinsya. Pinagbalin a kampo dagiti *Retooled Community Support Program* (RCSP), a dati nga *Peace and Development Team* (PDT), ti *Philippine Army* dagiti mismo a balbalay ti masa wenno ti tengnga ti kabalbalayan da. Inaldaw-aldaw a naduma-duma a langa ti pananglipit, panangallilaw ken panangallukoy ti inaramid da kadagiti masa tapno kumappon dagitoy iti reaksyonaryo a gobyerno ken labanan ti rebolusyonaryo a tignayan.

Nagirussuat dagiti nagtipon a pwersa ti Army ken pulisya

“**Imbes a kumappon da iti reaksyonaryo a gobyerno, intakder da ti bukod da a rebolusyonaryo a gobyerno.**”

kadagiti dadakkel ken agsisilpo nga operasyon militar iti erya. Dati metten a nabayag a kinampoan ti militar ti dadduma kadagito y a baryo. Nagirussuat da iti serbisyo a pang-medikal iti tulong ti *local government unit*, nagibunong iti sardinas ken noodles, ken dadduma pay a panaginkukuna ken pammarang.

Ngem kalpasan a pimmanawen dagiti RCSP, saan a pulos nagbaliw ti Nalabbaga a maris dagiti baryo. Ta imbes nga buteng, pannakaallilaw ken panagatras nga agtignay ti epekto ti militarisasyon kadagiti bumaryo, lalo pay ketdi a kinatured ken natibtibker a pangngeddeng nga agrebolusyon ti naimatangan kadakuada. Imbes a kumappon da iti reaksyonaryo a gobyerno, intakder da ti bukod da a rebolusyonaryo a gobyerno!

Panagitakder iti KRB

Iti apagbiit a panawen kalpasan a pimmanaw dagiti militar iti baryo da, nagmiting ti Sangay ti Partido Komunista ti Pilipinas iti baryo. Inamiris da ti kasasaad, ken inkeddeng da nga naimpanawenan ken kasapulan nga itakder dan ti Komiteng Rebolusyonaryo sa Baryo. Datin nga adda plano nga itakder daytoy, ngem saan pay a natultuloy gapu iti naduma-duma a makagapu.

Mano nga aldaw laeng kalpasan ti miting ti Sangay, naangay ti asembliya ti KRB. Sinigurado ti Sangay nga naan-anay ti bilang dagiti makaatendar iti amin a purok ken sityo ken amin a sektor ti umili a residente iti nasao a baryo. Nupay bassit laeng a panawen ti panagimbitar, dandani a dimmanon iti 100 dagiti timmabuno a delegado.

“Patibkeren ti bileg ti umili! Idur-as ti gubat ti umili!” Daytoy ti nagbalin a tema ti panagbukel

ti KRB. Iti aktwal a programa ket indatag ti obhetibo a kasasaad iti ekonomya, pulitika, militar ken kultura ti baryo. Insaruno ti panangsubli iti pakasaritaan ti rebolusyonaryo a pannakidangadag dagiti umili ti baryo. Sa da binukel ti pang-makatawen a programa ti panagtignay ti KRB, a dagiti nalalatak a linaon na ket ti panagirussuat ti KRB iti regular a kampanya iti panagrekrut ti agkameng iti NPA, panangpapigsa kadagiti organo a pannakigubat ti masa ken panangparegta iti agraryo nga rebolusyon. Kamau-dianan na ket ti panagbotos dagiti delegado kadagiti mangbukel iti konseho ti KRB.

Pudno a Demokratiko nga Eleksyon

Iti kabuklan na, ti Demokratiko a Gobierno ti Umili (DGU) ket maysa a gobyerno ti nagkakaysa a prente dagiti amin a demokratiko nga dasig ken pwersa. Gapu ta demokratiko, adda panagpapada iti pannakarepresentar dagiti tallo nga pwersa a mangbukbukel kadagito y: ti dasig a mangmangged wenno proletaryado nga ibagbagi ti Partido Komunista ti Pilipinas, dagiti basaran a masa iti kaawayan (dagiti nakurapay ken nababa-nga-akintengnga a manalon), ken dagiti akintengnga a pwersa.

Kas basaran a yunit ti DGU, ipatpatungpal kadagiti KRB ti panagpapada ti representasyon dagiti tallo a demokratiko a pwersa kadagiti mabotosan a konseho dagito y. Daytoy ti prinsipyo ti “tallo nga apagkatlo”. Iti panagpili dagiti agbotos a delegado basar kadagito y, maikonsidera met ti panagpili iti dadduma pay a sektor a nakapauneg met laeng kadagiti nasao a tallo a pwersa. Kas panggarigan, ikonsidera ti panagpili iti naan-anay a bilang ti minority, nga karaman met laeng iti basaran a masa. Wenno ti babbai ken

kabataan, a mabalin a maysa kadagiti pannakabagi met laeng ti Partido wenno basaran a masa. Dagiti met titser, nabaknang a mannalon, opisyal ti konseho ti barangay a karaman iti nangato-nga-akintengnga a mannalon ken dadduma pay ket karaman kadagiti akintengnga a pwersa.

Iti kabuklanna, naimatangan ti pudno a demokrasya iti eleksyon iti KRB. Ta nasigurado a naibotos dagiti pudno a pannakabagi ti nalawa a mayorya ti populasyon ti baryo, ken napaneknekan dagiti bumaryo nga karaman dagiti nabotosan kadagiti naregta nga agserserbi iti pangkabayagan ken pangmabiitan nga interes da. Naan-anay nga inlaksid dagiti burges ken pyudal a wagas ti eleksyon iti babaen ti reaksyonaryo a sistema ti eleksyon iti maysa a mala-kolonyal ken mala-pyudal nga agar-ari a sistema.

Ad-adu pay a KRB

Awan pay makalawas kalpasan a mabukel ti nasao a KRB, nabukel met ti KRB iti asideg a baryo, ken kalpasan na ket ti maysa manen a KRB iti asideg met laeng. Nayon dagito y nga Nalabbaga nga organo ti bileg pangpulitika ti umili kadagiti datin a naitakder iti naglabas. Iti sibubukel a rehiyon, immadu ti 25 porsiyento ti nakatakder a KRB ita a tawen. **B**

“

Iti kabuklan na, ti Demokratiko a Gobierno ti Umili (DGU) ket maysa a gobyerno ti nagkakaysa a prente dagiti amin a demokratiko nga dasig ken pwersa.

”

21 nga Army, natay kadagiti opensiba ti NPA-Cagayan

Tallo nga taktikal nga opensiba dagiti platun ti New People's Army iti Cagayan ti nalligian a nairussuat iti maikadua a paset ti 2020. Napasag ti kabuklan nga 21 nga agop-operasyon a tropa ti Philippine Army ken adu pay ti nasugatan. Awan kaswalti iti paset ti NPA.

Iti alas onse ti aldaw idi Hulyo 29, hinaras ti maysa nga iskwad iti babaen ti Danilo Ben Command-NPA West Cagayan ti maysa a platun dagiti agop-operasyon a tropa ti 17th Infantry Battalion idiy Baryo Mazi, Rizal, Cagayan. Innem a pasista ti dagus a natay, ken dagiti tallo pay a nasugatan ket natay met laeng apagdanon da iti ospital.

Idi Disyembre 5, innem manen a militar ti natay, a pakairamanan ti maysa a tinyente, ken walo ti nasugatan iti opensiba ti NPA idiy Baryo Bural iti Rizal. Agop-operasyon dagiti komposit a tropa ti 17th IB ken *Regional Public Safety Battalion* ti *Philippine National Police* idi ikeddeng ti kumand ti maysa a platun ti NPA nga biraen da dagitoy.

Maysa nga iskwad ti pinapagna ti kumand ti platun tapno biroken ken biraen ti maysa a platun ti kabusor nga agrik-rikos iti asideg, bayat a nagposisyon ti kadaklan a pwersa ti platun tapno bumira met nu umasideg ti kabusor. Sakbay ti ala una ti malem, napasungadan ti platun ti NPA ti umas-asideg a platun ti kabusor



ket binira na daytoy.

Dagus a binira met ti iskwad ti NPA a mangsursurot iti kabusor ti likudan da.

Idi Disyembre 26, aldaw ti maika-52 nga anibersaryo ti pannakaitakder ti Partido Komunista ti Pilipinas, pinasabogan ti maysa nga iskwad ti NPA iti babaen ti NPA Henry Abraham Command-East Cagayan ti maysa a platun dagiti agop-operasyon a tropa ti 77th IB idiy Mabuno, Gattaran, Cagayan. Innem a kabusor ti napasag ken sumagmamano pay ti nasugatan. **B**

Hukbo a Pang-laban, Pang-propaganda ken Pang-produksyon ni Ka Julia

Terrorista?

Daytoy ti reserbado a saludsod ko iti bagik nu mangngegak wenno mabasak ti ibagbaga dagiti militar, pulis ken opisyal ti gobyerno kanaig ti New People's Army. Sakbay pay daytoy a nagbalinak nga aktibista idi agbasbasaak iti kolehiyo. Nayanak ken dimmakkelak iti maysa nga ili iti Cagayan Valley ken nakapagkolehiyo-ak iti maysa nga unibersidad ti estado iti maysa a syudad ditoy.

Idi aktibista akon, naawatak a nalaing ti pudno nga prinsipyo ken kagagalad ti NPA manipud kadagiti pangpulitika a panagadal a natugawak, ken ti is-istorya met laeng dagiti padak nga agtutubo nga aktwal a nakipagbiag iti NPA. Ngem dagitoy ket puro laeng teorya ken istorya ti sabali a tao. Naan-anay a mamatiak kadagiti napagadalak ken ti ibagbaga da, ngem kamayatan na nu aktwal a maimatangak ken mapadasak.

Rebolusyonaryo nga Hukbo, Saan a Terrorista

Iti naminsan nga immatendarak iti panangselebrar iti anibersaryo ti pannakaitakder ti NPA iti maysa a base a gerilya, inkeddeng ko nga makipagbiag a kas na-

ka-tour of duty iti uneg ti minimum a tallo a bulan iti maysa a larangan gerilya ti NPA. Padasek nu kasano ti kongkreto ken aktwal a biag ken panagtignay ti maaw-awagan a

baro nga hukbo ti umili.

Iti uneg laeng ti tallo a bulan, nagadu dagiti napadasak, nakabakbakang dagiti nasursurok, naglalaok nga rigat ken ragsak, problema ken balligi, panagduadua ken natibtibker a panggeddeng ti innak nasa-grap.

Iti oryentasyon kanaig kadagiti alagaden ti NPA nga immuna nga inted kaniyak ti platun a nakapaunegak, naimula iti panunot ko diay *Tallo nga Alagaden kanaig ti Disiplina ken Walo a Banag a Rumbeng a Lagipen*. Ibagbaga ditoy ti rumbeng a suroten a nairot a disiplina a landok ti maysa nga

rebolusyonaryo nga hukbo ti umili, ti panangiyalikaka kadagiti mula ti mannalon, panangisubli iti uray sangkabassit a nabulod iti masa, saan a pananggundaway iti babbai, narespeto a panagsasao, saan a naulpit kadagiti balud a kabusor, ken dadduma pay.

Adda pay panagadal mi kanaig ti panangrespeto iti karbengan-tao ken sangalubongan nga makatao a linteg, a kas ti saanen a panangpaltog ken panangdangran kadagiti kabusor nga awan kabaelan nan a lumaban.

Damo pay laeng ket napadasakon ti naikuyog kadagiti taktikal nga opensiba. Iti aktwal, nairok nga impatungpalmi dagiti patakaran a kas ti panangliklik a mairaman dagiti masa iti labanan, nga aginggana't mabalin ket awan madadael a sanikua dagiti masa iti proseso ti operasyon, ngem nu adda man saan a maliklikan ket rumbeng laeng a bayadan ti NPA. Maiparit ti "overkill" wenno sobra a panagaramat iti adu a bala wenno napipigsa a pasabog a mabalin a sobra a mangdangran iti bagi dagiti tropa ti militar. Uray dagiti natayen a kabusor ket rumbeng a respetaren ti bagi da.

Kadagiti met aksyon tapno ipatungpal ti rebolusyonaryo a linteg, naipa-gunamguman nga dagiti laeng kapital a krimen a kaso ti sibilyan a nagdalanen iti umno a proseso iti babaen ti Pangukoman ti Umili ti maaksyonan iti pannusa a patay. Maipatpatungpal met ti patakaran kanaig ti panangiggem kadagiti pangpulisitika a konsiderasyon iti panangsango kadagiti kabusor ti dasig a nakalabsing kadagiti linteg ken patakaran ti Demokratiko a Gobyerno ti Umili.

Pang-propaganda, Pang-organisar

Iti panawen nga awan labanan, atiddog ti panawen dagiti ad-adu a yunit ti NPA kadagiti pangpulisitika a trabaho iti sidong dagiti masa. "Terorista" ti sangkadagullit ti kabusor; ngem apay nga ipatpateg la unay ken kail-ilwidagitimasaamarigrigat ken magungundawayan iti adu a barbaryo dagiti mannakigubat ti NPA! Naimatangak dagitoy.

Pasaray mangted kami kadagiti masa iti pangpulisitika a panagadal wenno literasi ken numerasi, agserbisyo-medikal ken dental nga awan bayad na, buklen dagiti organisasyon ken kooperatiba a kas tulong a mangpasayaat iti panagbiag da, agirussuat kadagiti kampanya ti mannalon a kas ti panangpangato ti tangdan dagiti makitegged wenno panangibaba iti interes ti pautang, agipablaak iti dyaryo wenno agiwaras iti polyeto.

Nu adda ti yunit mi iti baryo, masansan a mapuyatak gapu iti aatiddog a pannakiinnistoryaan ken panangted-pammagbaga kadagiti adu nga idatdatag dagiti bumaryo a probproblema da. Nu addaak iti balay ti masa, mayat ta makasursuro-ak nga agbalsig ti pagaron, agsakdo ti danum idiay bubon, ken agala ti aba wenno agbatok ti lames iti karayan a pagsasangoan mi a sidaen kadagiti masa.

Pang-produksyon

Iti mano a bulan a panagtignay ko iti NPA, adu ti nasursurok kanaig iti trabaho a produksyon.

Inikkan ti panawen ti yunit

a nakapaunegak iti panagtrabaho mi kadagiti proyekto a pangproduksyon a nayon a paggapuan dagiti kasapulan ti umad-adu a yunit ken pwersa ti NPA. Kas dagiti inaramid a bukod a pagumaan ti pagay, saba ken natnateng ti yunit mi. Panagtaraken kadagiti dinguen, ken lames kadagiti inaramid mi a piskeria.



Regular a tumulong kami met iti trabaho a produksyon ti masa, lalo nu panawen ti panagbuburas ti mais. Pasaray makibuburas kami met, agibilag iti napusi a mais, agbagkat ti sinaksa-ko a mais. Nadanon-ak pay iti karugi a maysa a sosyo-ekonomiko a proyekto a para iti organisasyon dagiti masa ngem timmulong ti hukbo a mangipatungpal kadaytoy.

“ Nairok nga impatungpalmi dagiti patakaran a kas ti panangliklik a mairaman dagiti masa iti labanan. ”

Panagdesisyon Tapno Ag-pultaym iti NPA

Ik-ikkan met ti komite ti Partido a mangidadaulo iti platur ti NPA a nakapaunegak iti naan-anay a panawen tapno sangoen mi dagiti pang-uneg a trabaho iti konsolidasyon. Agadal kami iti rebolusyonaryo a teorya ken pulitika, kongkreto a kasasaad

ti erya a pagtigitnayan mi, agtasa iti naglabas a trabtrabaho, agplano, agdidinnillaw.

Kinaagpaysona, saan kon a lineppas ti naikeddeng a minimum a tallo a bulan a *tour of duty* tapno agdesisyon nga agpultaym iti NPA. Ta napaneknekak nga iti nalawa a paset ti pagilian, nu awan ti hukbo ti umili ket awan uray aniaman dagiti masa a marigrigat ken magungundawayan. Ken babaen laeng iti panangidur-as iti maysa a rebolusyonaryo a gubat ti umili a magibusan ti mananggundaway ken manangikuspil a sistema nga mangad-adipen iti umili a Pilipino. Iti ititipon ko iti NPA, nagbalinakon a paset ti maysa a natan-ok, nadayaw ken nabannuar a rebolusyonaryo nga hukbo.

Nakakatkatawa, ta ti AFP a mangitudtudo iti NPA a kas terorista ket isu met ti awan panangisakit na iti kinatalged, kabiagan, kalikagum ken biag dagiti nalawa a masa a marigrigat. Napaneknekak nga agtakaw da ti manok ken diguen wenno pagbalinen a kabit dagiti assawa ken annak a babbalasang dagiti mannalon; agpapatok ti paltog wenno agitupak ti bomba wenno agibato ti granada nga awan pulos konsiderasyon na kadagiti masa iti lugar.

Isuda ti pudno a terorista! **B**

Mary Grace “Ka Tina” Bautista: Modelo nga Rebolusyonaryo a Kadre ken Ina

(Manipud iti Mensahe ti Pammadayaw ti Komiteng Rehiyon sa Cagayan Valley ti Partido Komunista ti Pilipinas Kanaig ti Panagmartir ni Kadua Mary Grace Bautista)

Dakkel a pukaw iti Komiteng Rehiyon ken sibubukel a rebolusyonaryo a pwersa iti rehiyon ti panagmartir ti maysa a naregta, natibker, produktibo iti trabaho ken natadem ti panagpampanunot na a kas kenni Ka Tina.

Naggapu isuna iti pamilya ti nakurapay a mannalon. Ti panaggapu na iti basaran a masa ti pakaramutan nu apay nga kadagiti saritaan kanaig iti rebolusyonaryo a panagbalbaliw ti gimong ket napartak ken natibker isuna a makaawat ken agdesisyon, nu pay ti kaipapanan ti desisyon ket dadakkel a personal a sakripisyo para kenkuana; nu apay natibker isuna a mangsango ken napartak a mangringbaw kadagiti nadadagsen a problema; ken nu apay adayo ken nauneg ti sirmata na iti adu a mayor nga saritaan.

Ti pannakadamili na iti narigat a biag ket basaran iti panagdakkel na nga responsable ken nagaget iti trabtrabaho, positibo a kagagalad nga inawit na inggana’t nagbalinen a pangrehiyon a kadre ti Partido ken opisyal ti NPA.

Naiyanak ni Ka Tina idia Liwan, Enrile, Cagayan idi 1973. Awan bukod a daga ken makikadkadua ni tatang na ken labandera ni nanang na. Inauna isuna kadagiti lima nga agkakabsat. Iti laksid ti kinakurapay ken babaen iti bukod a panagbannog ket nakapagturpos isuna iti hayskul.

Nariing ken naorganisar isuna iti rebolusyon idi 1991. Narekrut ni Ka Tina a kas kameng ti Partido idi 1993. Nagasawa isuna iti pada na nga pultaym a rebolusyonaryo idi 1994. Naaddaan da iti tallo nga anak.



Kas maysa nga organisador, aktibo isuna iti panagirusuat kadagiti nababalligian a kampanya ti mannalon, kas ti kampanya para iti irigasyon ken panangpangato ti presyo ti produkto ti pagay. Idi 1999, nagbalin met nga organisador ti kabataan idia Isabel a nu sadinno ket timmakder a kalihim ti Grupo ti Partido ditoy.

Naiduron ni Ka Tina nga agtrabaho iti ballasiw taaw a kas *domestic helper* iti dua a tawen gapu iti nairot a panagkasapulan ti pamilya. Intultuloy na ti panagtignay idia a kas naregta nga organisador dagiti pada na nga *overseas Filipino workers*.

Apagsubli iti Pilipinas idi 2003, intuloy na ti panagtignay, a kas maysan nga aktibista mainaig iti karbengan-tao. Nagbalin isuna a kameng ti Pangrehiyong Komite sa Puting Purok. Iti tengnga ti nakaro a kinaranggag ti estado idi 2006, pinili na ti dalan ti rebolusyonaryo nga armado a pannakidangadang.

Kas kadre ti Partido iti uneg ti organisasyon ti NPA, naituding ni Ka Tina a kameng ti Komite ti Laran-

gan iti Cagayan idi 2007. Karaman kadagiti adu a natrabahoan na ti panangidaulo iti panagregta ti rebolusyon agraryo, kas ti naimballigian nga kampanya ti panagpangato ti tangdan dagiti mangmangged-talon idiy Piat, Cagayan.

Idi 2011, natiliw ni Ka Tina iti maysa a dependensia a labanan a nu sadinno ket lima nga kakadua ti nagbuwis ti biag na. Naibalud isuna iti uneg ti uppat a tawen. Apaman a nawayaan, dagdagus nga nagsubli ken timmipon iti dati a nakapaunegan na a larangan gerilya.

Nabotosan ni Ka Tina a kas kandidato a kameng ti Komiteng Rehiyon iti kabukbukel a Maikapat a Komiteng Rehiyon ti Cagayan Valley idi Oktubre 2016. Nabotosan a kas regular a kameng ti KR idi Disyembre 2019.

Modelo isuna iti kinatibker nga agrebolusyon. Adu a nadadagsen a pannubok ken sakripisyo ti sinango na. Nu pay adda anak nan, sititibker isuna nga simmina kadakuada idi inkeddeng nan a tumipon iti NPA, a nu sadinno ket nagsisina met dagiti anak na a tinaraken wenno nakipagyan iti naduma-duma nga tao. Natiliw isuna iti maysa a nakaro a dependensia ken nabalud iti uppat a tawen. Nagmartir ti inauna nga anak na iti maysa nga opensiba a labanan idi 2017. Saan a mabilang a problema, pannakapaay, panagatras ken dillaw a sinango iti unos ti panangipatungpal ti kinapaunegan na a kolektibo iti trabtrabaho. Amin dagitoy ket nabaelan na nga obhetibo nga amirisen, baklayen ken ringbawan ken lalo pay a nangpatangken iti panggeddeng na nga agrebolusyon ken iti nangato a talek na iti Partido ken rebolusyonaryo a tignayan. Masansan na nga ibaga lallalo nu adda problema: “awan ti lugar ti panag-atras.”

Modelo isuna a Komunista ken rebolusyonaryo nga ina ken asawa. Iti intero a rehiyon, pina-ka-naisangsangayan ni Ka Tina a kas maysa a rebolusyonaryo nga ina ken asawa. Idi pay agtigtignay da ti asawa na iti syudad, naballigian dan nga inmula ti rebolusyonaryo a kamulatan ken pagbalinen met nga aktibista dagiti anak da. Naringbawan na ti napigsa a guyod iti maysa nga ina ti pagayatan a padakkelen a nasayaat ti anak na iti sidong na ken impangruna na ti panggeddeng a mayadayo kadakuada idi limmaoken iti armado a dangadang.

Nu pay dandanin agturpos iti kolehio ken makapagtrabaho kuma a kas propesyonal ti dua nga anak na, pinalawagan na ida nga iti babaen ti agdama a sistema ti gimong, awan serbi ti makaala ti kurso ken napatpatag ken nadaydayaw nga amang ti panagbalin a Nalabbaga nga hukbo. Naballigian na nga indaton ti dua nga anak na iti armado a dangadang ken dakkel ti paset na iti panagbalin da a kas nalalaing ken nareregta a kadre. Iti tengnga ti panagladingit, sidadayaw a timmakder idi nagmartir ti babai nga anak na iti maysa a reyd ti NPA iti safehouse ti kabusor idi Hunyo 2017.

Iti atiddog a panawen na iti NPA, awan nakita wenno nangngengan kenkuana nga aniaman a langa ti burges ken pyudal a relasyon na kadagiti anak ken asawa na.

Natadem nga agpanunot, naregget nga agtrabaho ken nalaing a makipulapol. Nairot ti panangawat ken panangiggem na kadagiti linya, prinsipyo ken patakaran ti Partido, isu a nabunga dagiti trabtrabaho ken nalaka na a maamiris ken mailinteg dagiti gapu ti nagkurkurangan ken kamali. Nagaget, naurnos, sistematiko ti panagtrabaho. Trabaho a pinansya ti inakem na iti atiddog

a panawen ken nabunga ti panangipatungpal na kadaytoy. Nakuna na nga “ti arapaap ko ket maited amin nga kasapulan dagiti kakadua.” Natanang, saan nga ablat nga ablat ti sarita, panunoten na nga nalaing ti ibaga na uray isuna ti makapungtot.

Idi nataenganen, uray makarikna ti sakit ti tumeng ken saka, ibaga na latta nga “mapanak agbunag” ti suplay ken sumurot latta kadagiti kakadua nga agkabanuag. Napudot a makilangen kadagiti kakadua ken masa. Natulong kadagiti kakadua nga agproblema wenno adda kasapulan na a pannarabay ken tulong.

Iti amin a benneg dagiti rebolusyonaryo a trabtrabaho, kanayon nga impangpangruna ni Ka Tina ti interes ti kabuklan, ti dasig a proletaryo, ti umili ken rebolusyon ken impauneg na ditoy dagiti personal ken indibidwal na nga interes.

Indaton ni Ka Tina ti kangangatoan a tukad ti panagsakripisyo idi nagbuwis isuna iti maysa a labanan idiy Mabuno, Gattaran, Cagayan idi Agosto 15, 2020. Immuna a nakita na ti uppat a kabusor ket pinaputokan na dagitoy. Maymaysa a nakipinnaltogan. Nasugatan na ti maysa a nakalaban, ngem tallo met ti tama na iti naduma-duma a paset ti bagi. Pimmusay kalpasan ti walo nga oras, iti alas tres ti malem. “Awan oras ti panaginana,” “agbiagak,” “talaga a kasta ti biag” - dagitoy dagiti naudi a sarita na.

“Agbiagak,” kuna ni Ka Tina idi matmatayen isuna. Pudno nga agbiag ti Ka Tina uray inton kaanuman. Ta napasag man ti bagi na, dagiti naimbalitokan nga adal ken lagip iti biag ken panna-ki dangadang na ket agtalinaed iti puso ken panunot dagiti agrebolusyon nga umili iti naunday a panawen. **B**

Naindaklan a Bulong ti Rebolusyon

Para kenni kadua Mary Grace “Ka Tina” Bautista

ni Lyudmila Salvador

Manipud iti apagrusing a bulong
Inaldaw-aldaw a lumanglangto
Kakuyog ti dadduma a nakasango
Iti pana-panawen nga init ken tudo

Nadanon ti bukod iti kadakkelan
Iti sinamar ti init ket saan ngamin nalingdan
Napaut nga nepnep ken tikag ti nakatenneban
Panagrangpaya, saan a nalapdan

Panagrusing agingga’t kadakkelan
Paspaseten para iti puon ket naindaklan
Pada ti natan-ok a puon a nagtaudan
Nagbalin a bulong a naisangsangayan

Saan a simple a panagkapet ti panggep na
Pada ti nalalangto a bulong a dadduma
Iti puon a nagtaudan,
panggep ket mangted-pigsa
Isu’t puon ket saan a nalaka a maitumba

Ngem nairut a kapet ti sanga ket nagpatingga
Napipigsa nga bagyo ken igges
ti nagbalin a pangta
Iti pul-oy ti saan-a-malapdan a panawen
Panagnakanak ket nadanonan

Naindaklan a paset- saan ditoy agpatingga
Mangnayon pay daytoy a ganagan ti daga
Tapno sagepsepen ti puon a nagtaudanna
Ken bulbulong ket nasalun-at a rumangpaya

Dagiti nabati nga sikakapet iti sanga
Nga iti panagbiag ti puon ket addaan paset
Nag-ibbat man ti saggaysa
Kaaduan latta ti nairot a nakakapet

Iti siray ti init, imbag ta naikkan
Ngem malaksid daytoy ket adda pay danum
Danum nga adda iti naapres a karayan
Apagdanon iti baybay ket agdalluyon lattan

Piman pay ngamin ti puon a nagtaudan!
Adda da agarapaap a mabuwal
Manglungsot,
Ken aggandat a mangpukan

Panagtaud daytoy ket duron da met laeng
Isuda nga addaan narugit a gandat
Isu’t pursigido nga dumakkel
Tarigagay ket madanon ti tangatang

Ti kaadu ti didigra nga nagpasar
Lalo nga tumibtibker
Init, danum, bulong
Ti gapu no apay a sitatakder

Ngem ti nabileg a pakinakem ti puon
Aggapu manipud iti ganagan ti daga
Ganagan a maur-urnong
Nga indaton dagiti naindaklan a bulong

Karit daytoy ti dadduma nga bulong
Kasano’t mangipaay ti dadakkel a paset para iti puon
Tapno ganagan ket manayunan pay
Ken puon ket dumakkel pay

Karit daytoy kadagiti nabati nga rebolusyonaryo
Kasano a pairuten ti kapet kadagiti prinsipyo
Tapno nabaknang nga adal ti biag
ken panagtignay ket umadu
Ken tignayan ket umabante lalo!

Abante!

(Kalpasan ti panagadal ti Abante a Kurso ti Partido)

Manipud ita, umabante tayon
kadagiti agur-uray nga masa ken trabaho
maiserran ti pagadalan a tinugawan tayo
ti disisyete nga aldaw
kalpasan a sarangeten ti abante a kurso
a nabayag nga inuray
a nu sadinno ket binatang ti nakaun-uneg
a kaammoan nga igam
iti panangwaya-way a sangkatao-an.



Pinauneg tayo ti pakasaritaan ti lubong
 ken kapanunotan ti tao
 ket nakikaykaysa ti amin – limmiklik ti bagyo
 ken nagsardeng ti tudo, ken dimngeg
 uray ni Apo
 idi pagdiskutiran no ania ti immuna, ti panunot
 wenno ti material a lubong.
 Nagdaliasat tayo ken nagsubli iti sangapulo
 ket tallo a bilyon a tawen sakbay ita
 Ket nagtigerger ni Apo idi biroken tayo
 ti murdong ti uniberso
 Ken naammoan a daytoy ket awan-patinggana,
 awan rugi ken gibus na.
 Ginudwa-gudwa iti duwa ti amin a banag ket naamiris
 ti gapu ti panagbalbaliw ken panagdur-as
 Ah, kabaelan gayam nga awaten
 ti aniaman a misterio
 Iti panagdur-as ti kaammoan manipud
 ti panagrikna agturong iti pannakaawat
 Ken kabaelan a baliwan uray ti kasla
 saan-a-magaraw a lubong!

Inusig tayo ti naggapuan ti tao
 manipud tinengngel na ti umuna a ramit ti panagubra
 ken manipud sadiay ket immabante ti tao
 gapu iti panagubra, ken iti wagas ti panagubra
 Ti gimong nga naidasay iti kinakurang
 ket nagparnuay iti aglaplapanan
 ken manipud iti sigud nga agkukuyog a
 panagparnuay ket nagturong
 iti pannakabingay-bingay ken panangringbaw
 ti maysa nga dasig iti maysa pay
 addan ti agbibig a nalabon,
 manipud iti panagubra ti awanan pulos
 dimmur-as ti gimong manipud iti panagtrabaho ti
 adipen, ken dagiti inappuko na nga adipen ti
 daga ken adipen a masu-suelduan
 a nangbussog iti awan ub-ubra na
 nga apo't adipen, ken dagiti inappuko na
 nga apo't daga ken apo ti puonan
 nga ti murdong na ket sosyalisasyon
 dagiti pwera ti panagparnuay
 a basaran tapno tumaud ti gimong a nadur-as ngem
 kaing-ingas ti immuna-sangsangkamaysa
 ti panagtrabaho ken bingay iti kinabaknang
 dagiti agparparnuay.

Ngem saan tayo a nakuntento a pasyaren laeng
 ti tinaray dagiti gimong
 Isu nga pinersa-persay pay ti kaunggan ti sistema
 a mangrabraw iti mangmangged
 ket manipud kadagiti kumplikado a panagkwentar
 ket naibulgar ti sikreto ti kapitalismo- ti
 teorya ti sobra a gatad
 nga manipud sadiay ket nagturong iti panagsuek
 ken krisis
 saan a gapu ta kurang, no di ket sobra ti napartuat
 numanpay aglaplapanan ti adda't dita
 a makan ken ramit,
 pinangen-pangen met ti agbisin ken awanan.
 Agingga't dimmanon iti monopolyo
 a tukad nga bimmalkot iti sangalubongan
 ngem bisperas met laeng daytoy
 ti sosyalista a rebolusyon
 a naminsan a nangwaya-way
 iti apagkatlo ti lubong.

Immabante tayo pay ket nakita
 ti masakbayan ti tao
 iti panangtalyaw kadagiti panagtaud
 ti diktadurya ti proletaryado
 a nangpalangto iti adu nga napipintas a banag
 a pinarnuay ti panagubra ken sirib
 dagiti anakling-et
 a dagiti Stakhanovite iti sosyalista
 nga industriyalisasyon
 dagiti Nalabbaga nga Hukbo
 iti Patriyotiko a Gubat ti Sobyet
 dagiti nangtenneb ti landok
 iti Naindaklan nga Aksaw Paabante
 dagiti mannalon nga nangpadur-as
 iti binato nga daga ti Dazhai
 ken dagiti Nalabbaga nga Gwardya
 nga nangiggem
 iti Nalabbaga a bandera iti proletaryo
 a rebolusyon a pangkultura
 a pammaneknek amin nga awan sabali a
 masakbayan nu di Komunismo.

Umabante tayon manipud ita
 tugot ti panunot ken panggeddeng a pinatadem,
 pinasilap
 ti abante nga kurso nga armas iti panagdaliasat
 iti nasiiit a laban, pangruar man wenno pang-uneq
 mapan iti abante a tukad ti estratehiko a depensiba
 Ken labes na pay, agingga't mapunas
 ti pananggundaway

Emil Magalat
 Nobyembre 30, 2018